

Ebelu

Tshapita 1

1 Nkumundjeyi ondoyaki ditephelaka ele baapha nda tompudi eusa o la nda yophu eusa nda betsho eki oso m'ele basangi; 2 andi otephelaki ele isho nda Bona nda esuka enda betsho beiko; andi ondokitshaki Bokitshwa bonda djomba diuma; andi otongaki djomba diumela m'ele andi. 3 And'iko ale ephetelo enda ditombya dinandi, la esangelo enda bophu bonandi; andi ayadi dikataka djomba dinkumela la lolaka lonandi lona mpamba. Akiandi akokyaka eokyelo en'embe nko andi mele, andi aoyulama nda lo londa bolomi londa Botombyami nd'adiko. 4 Ko andi okolaki djowa dilekola diko inda bandjelo la boloko on'andi aokita dina dilekola baina bandiyo. 5 Djoji in'andi otephelaki wina bomodi ele bondjelo bonkono botephelo one mbo, We ondoyadi Bona onami; emi mbokota wina one? La bonkina one mbo, Ndokoyala Apha el'andi la andi aokoyala Bona ele emi? 6 La onkina mbo, Andokundodyandi Bona dikinda na motshi endilama banto, andi aosanga ayandi, Bandjelo bana Nkumundjeyi boomemyi. 7 La bonkina mbo, Andi osangaki djoji inda bandjelo ayandi, Andi aolaanga bandjelo banandi bedimo la bankambi banandi lombi londa tsha; 8 aye andi osangaki djoji inda Bona ayandi, We Ndjambi, bokala bondawe bona Nkumu bokotshikala botshwako, botshwako; ingondjwa indawe ile ingondjwa inda bonanwa. 9 We ombolanga baoui banda benanwa ko we ombotona baoui banda diphakatano; sheko, Ndjambi, ale Ndjambi endawe ambokodisa la nsadi enda bosadu nd'adiko anda baina bandawe. 10 La onkina mbo, N'angolelo we onaangaki motshi, we Nkumu, la ndjola iyadi ekambelo enda bakata bandawe. 11 Djomba dine diyokophitana, aye we okotshikala; diko dikokadwa shenda etoo, 12 we okomba diko shenda bokutu, la diko dikophaningwa; aye we oyadi nko phyophyo diiyo: mbula indawe iphongotenyalami. 13 Ko andi osangelaki bondjelo onkono wina bomodi mbo, Ulamaka nda lo lonami londa bolomi elengi ndi ndokilalomi batonyi bandawe shena mbata enda bekolo bendawe? Iyo bauma baphoyadi shenda bedimo bekiandi asokolaka diyokambela baiko baokokita yika?

Tshapita 2

1 Nda boloko one diyadi la isho dilekola yokodya baoui bakiso wokaka, tophoyoselemwa m'ako. 2 L'olok'onda shene eki lolaka loki bandjelo asangaka dikembyamaki, la bophedya bouma la lonkala louma batshininyamaki nda iyedi imbokoka, 3 sheleko ekosukamalomi isho nkina isho tokembola yika ene ena enene? Isho toloka djoji ind'eko n'angolelo aki

Nkumu atosakolaka, la bosako boiko okokomyamaki ele isho ma baiko bandookaki. 4 O la Nkumundjeyi okokomyaki bosako bondiyo la dishile o la baoi banda diphepha la bekeledi bena mpamba yophu la yophu; o la bekakaya bena Nyuma end'Olotshi shene eki lolango lonandi.

5 La boloko ona andi atokitedya bandjelo motshi esoko eokoyaka, eko esanga isho; 6 aye bonto omodi osangaki na empudi enkina ayandi, Bont'okidi oyadi no inda we yoophwa? Nkina bona on'onto inda we yokendela? 7 We ondookitedyaki empudi n'ase anda bandjelo; We ombolaphya isuku inda ditombya la dimemya nda botsha. We ombookitsha nd'adiko anda bolimo bonda bakata bandawe; 8 We olila djomba diuma n'ase banda bekolo benandi. Akiandi wokitedyaka djomba diuma, andi atotshika emba ephoyadi n'ase anandi. Ko, nda ekeki ene totophena djomba diumela n'ase anandi, 9 aye, isho yenaka Yeso, one ondokitedyamaki empudi enda ishishi n'ase anda bandjelo ina andi dishingyama nda bewedi, ambuledyama nda ditombya la dimemya; sheko, ma diyota inda diphepha dina Nkumundjeyi andi oshingyamaki nda bewedi la boloko on'ankuumela. 10 Andi otongaki djomba diuma, la djomba diko diuma iyotongamelaki: ko akundodyalomi andi bana band'ele eusa nda ditombya, ekoka Botongi bonda bya dikomanya Bolokodi bondiyo la nshilingi. 11 Djoi inda boiko ondoyadi yakidyaka la baiko baokidyama bale etenyi ephoko; dika diko andi aphoki nsonyi yaeta mbo, Baina banami; 12 ayandi, Ndokosangela ban'and'Apha dina indawe; Ndokokembela nyembo nd'atei anda Ekelezia. 13 Djoi dinkina mbo, Ndokekama el'andi. La dinkina mbo; Phalaka emi la bana baki Nkumundjeyi ankaaka. 14 Sheko djoi inda bana bale la bounu la bolungu, andi o mele osanganaki la iyo nda djoi diko, ina andi yotshwa nda bewedi inda ditekyo boiko boyadi la mpipho enda bewedi, ayawe diabolo; 15 la ditshongola baiko bouma atshongamaki nda bontamba betsho bendiyo beumela nda bophodu bonda bewedi. 16 Soosolo, andi atokata bandjelo la dikata, aye andi okataki bankana banda Abalama. 17 Sheko diyaki la andi diwana la baina banandi nda baoi bankuma ina andi diyala botshedi bond'oso ayadi la lokesedi o la itshidi nda baoi bana Nkumundjeyi dinda dilambolela banto bolambo djoi inda baoi bandiyo ban'embe; 18 la boloko bona andi mele aoshingyama nda bakutsha, ko andi yeyaka ditana baiko baokutshama.

Tshapita 3

1 Sheko baina bandiso banda ekila, baoletama nda iyeta inda loola, lokanedyaka Ekima la Botshedi bond'oso bonda yimedya endiso, Yeso andi o munge; 2 andi ayadi la ikotomedya ele One ondookaaki mpipho,

shene eki Mose la ikotomedyana nda lodu lonandi bya. 3 La boloko one andi aoleledyama mbo, Ambokoka ditombyama la ditombya dilekola Mose; djoi inda boshumyi bonda lodu aolekola lodu lohumyandi ditombya. 4 Dumba londa lodu louma loyadi la boshumyi bonda loko, aye Nkumundjeyi ale Boshumyi bonda djomba diuma bya. 5 Onde, Mose aki la itshidi nda lodu lonandi louma shenda bonkambi nda ekambelo, nga boenyi bonda baoni baongasa disambedyama m'okongo; 6 aye Kilisito, ale nga Bonda dwele la mpipho nda lodu lonandi; isho toyadi lodu lonandi, nkina tokotshidingana la ntepho la bokemba bonda dilindedya indiso elengi ndi esuka.

7 Dika diko Nyuma end'Olotshi aotosisela djoi ayandi, Wina one, nkina inyo lokokodyalo lolaka lonandi, 8 Lotokakatadyaki betema beninyo nda wengesanyi Nda iyedi inda wina onda bakutsha nda boswe, 9 Aki baisho baninyo amekakemi; Akiyo wenaka ekambelo enami mbula benkama enei. 10 Sheko, emi ndotshudungana la lotshwelo loiko nkele, La emi osangaki mbo, Iyo bolongusana nda betema bendiyo; Iyo batophokola mboka inami; 11 Sheko, emi otshimbaki la nkele, ayemi, Baiko baphongotshwa nda yutsha enami. 12 Baina andiso, lephwaka, bonto oninyo bomodi bophoyoyala la botema bon'ombe bonda diphedya, inda yungusana m'ele Ndjambi enda lomo; 13 aye lolakanaka la wina la wina nda ekeki ene endosanga isho mbo, Win'one; bomodi boninyo bophoyokakatana nda batshuya banda baoni ban'embe. 14 Djoi inda isho tomboyala tosoke tonda Kilisito, nkina tokotshidingana la losaseka londiso loki oso elengi ndi esuka. 15 Shene akiyo asangaka mbo; Nkina inyo lokokodya lolaka lonandi wina one, Lotokakatadyaki betema beninyo shene ekiyo akelaka nda wina bokiyo wengesanaka. 16 Banto bankono baolengesana akiyo wokaka no? Atoyala bya endiyo baolola la Mose ma Edjipitu? 17 Andi aokonela bankono nkele mbula benkama enei? Apha baiko baokela bembe? Bedwo bendiyo ekweki nda boswe. 18 Andi aotshimbela banto bankono mbo, Inyo lophongotshwa nda yutsha enami? Apha baiko baophedya lolaka? 19 Sheko, tombena mbo, Iyo bateyi yotshwa la boloko bonda diphedya.

Tshapita 4

1 Nda ditshina inda toyadi la dilaka dinda yutsha enandi, toyali la bophodu, bomodi boninyo bophoyunga yotshwa nkoko. 2 Soosolo isho tombosambedyama bosako bonda bolotshi o shenda iyo; aye lolaka lokiyo wokaka lotatani la boloko onda baiko baoloka botephelo batoyala la yimedyana. 3 Djoi inda isho ane tolimedyana, tombotshwa nda yutsha; shene ekiandi asangaka ayandi, Emi otshimbaki la nkele ayemi, Iyo

baphongotshwa nda yutsha enami; nkula bolimo boshidiyama ma angolelo enda bokidi. 4 Nda ditshina ina andi osangaki na empudi enkina la boloko onda wina bona nsambo shene, ayandi, Nkumundjeyi aolutsha nda wina bona nsambo ma belimo benandi beuma; 5 la djoi dinkina mbo, Iyo baphongotshwa nda yutsha enami. 6 Sheko, djoi inda etetenyi etshiki enda bamodi yotshwa nkoko, la baiko baolamba bosako bond'olotshi boiko nd'oso batotshwe nkoko la boloko onda iyo batimedye djoi; 7 andi aoluta disona wina boiko bonkina ayandi, Win'one, (shene eki Davidi asangaka nd'oso) ayandi, Nkina inyo lokokodya lolaka lonandi win'one, Lotokakatadyaki betema beninyo. 8 Atoyala Yashua aolakaya yutsha, tshika andi atotephela m'okongo inda wina bonkina bokoyaka. 9 Sheko eutshelo enda banto bana Ndjambi etshiki. 10 Nda ditshina ina andotshwa bonto nda yutsha enandi, andi yeyaka yutsha ma belimo benandi menge, shene eki Nkumundjeyi wutshaka ma belimo benandi menge. 11 Sheko, totshidingani inda yotshwa nda eutshelo ene, bonto ophoyokwa nda iyedi isoko inda diphedya botephelo. 12 Nda ditshina inda djoi ina Ndjambi ile la lomo la bokalanganano; diko dilekola mpau enda benkako ephe mpya la diko iyadi la ditshungunedya inda dikapha botema la bodimo, la bayonga la mpongo; la diko yeyaka yishola nkanedya la disangedya inda botema. 13 Lako emba etongamaki yeyaka yishama m'ele andi; aye djomba diumela diyadi phe nko betaka la phululu nda baisho banandi; Bone aokotenola beloko bendiso.

14 Shene, djoi inda toyadi la botshedi bond'oso ondolekaki na ndjola, Yeso Bosoka Ndjambi, tomamemi la yimedya endiso. 15 La boloko onda tophoyadi la botshedi bond'oso bopheyi ditooka ishei nda todutsona, aye andi aomekama la baio baumela phe nko shenda isho, aye andi aolangana la baio ban'embe. 16 Sheko, totutami la ntepho nda iyeko ina Nkumundjeyi inda diyota inda diphepha, inda isho yamba ishei la yaya diyota inda diphepha dikoka ditotana nda ekeki enelenganisho.

Tshapita 5

1 Djoi inda botshedi bona onene boumela ondostonamaki m'atei ana banto aokitshamela banto nda baio bana Nkumundjeyi ina andi dilambola bekakaya la belambo benda dikuka baio ban'embe; 2 andi yeyaka dikesela baiko bapheyi baio, o la baiko baolungusana, la boloko ona andi menge aodingama la yodu. 3 Dika diko diyadi la andi dilambola belambo benda dikuka baio ban'embe nda ditshina dinandi menge. 4 Ko lako bonto bondoyadi diyaumbyaka nda dimemya dine, phe nko Ndjambi yeyaka yosona; shene eki Arona wetamaka. 5 Sheko o la Kilisito atoyaumbya inda diyala Botshedi bond'oso, aye One ondostonangelaki ayandi, We ole Bona

bonami, Emi nshokota wina one; 6 and'iko otephelaki na empudi enkina ayandi, We oyadi Botshedi diiyo Nda diwanya inda Melekinzedeke. 7 Nda betsho ekiandi nda djongi, andi olambolaki yotsha la yoonda la balelu band'oolo o la baisodi ele one boki la mpamba enda yoikya m'atei anda bewedi, (la andi aolokama djoi inda dimemya ikiandi amemyaka Nkumundjeyi). 8 Nkula andi aki Bona, andi aolakwa yambodya ma elu ekiandi akindaka; 9 ko akiandi akomanaka olotshi andi aoyala waangi bonda yika enda diiyo ele baiko baumela baolambodya. 10 Sheko, Nkumundjeyi aoleta ayandi, Botshedi bona onene bonda iyedi inda Melekinzedeke. 11 Isho la baoi phala banda disanga la boloko ona andi, bayadi boolo bonda diphokola nda ditshina ina inyo lophokumi yokodya. 12 Nkula ekeki embokoka ena inyo diyala baekyi, inyo lombelengana la bonkina bonda yuta dilekya baoi bana angolelo enda yekyelo ena Nkumundjeyi; lomboyala shenda bana basamba diloma baele, bapheyi dila toma tona bomaka. 13 Djoi inda bonto bouma bonoma baele atophekela botephelo bona bonanwa; djoi ina andi ale phe nko iyana mpou. 14 Aye toma tona bomaka toyadi toma tona am'ele, baiko baolekela, baoyala la mpima indiyo imbokembyama, ikoka dikandjwa baoi banda olotshi o la baoi ban'embe.

Tshapita 6

1 Sheko, totshiki betephelo beki oso enda Kilisito, ko totshidingani nda baoi bana am'ele; totuti dilonga etshina enda dikalanganya betema ma bekeledi bepha la lomo, la yimedya ena Ndjambi, 2 o la yekyelo ena mbatisa la enda yaphya bakata, o la enda yetshwa ma bewedi, la enda elombolelo enda esuka enda botshwako; 3 tokokela shiko nkina Ndjambi aimedya. 4 Djoi inda baiko baoshila diphetelama la iyani ina Ndjambi, baolokodya ngombo enda bokakaya bonda loola, baolamba ekaphelo ena Nyuma end'Olotshi, baolokodya ngombo enda lolaka londa bolotshi lona Nkumundjeyi, la baoi bana mpamba banda ekeki ekoyaka, 6 ko m'okongo baoluta ma aiko ambutembute, yita yauteya nda dikalanganya betema ipheyani; nda ditshina inda iyo baoluta didjaka Bona ona Ndjambi nda bosongo bona ndekesanya nko iyo menge, baolotola nda phululu. 7 Djoi ina motshi iyadi dimelaka mbula edwa nkoko betsho phala, iyadi ditshweki tonkankashi tole bolotshi bonda dila ele baiko bayadi yokambaka; la Nkumundjeyi ayadi yotshwakolaka insonyi. 8 Aye nkina iko iyadi ditshweki baeki la baphengolankoi, iko ikoyala o mpampa la iko imbasa yilama wambo; esuka enda iko phe nko ditshumbama. 9 Balangami, nkula tombotephela shene, tombasa yena baoi baolekola olotshi m'ele inyo, baoi baokomana la yika. 10 La boloko ona

Nkumundjeyi aphosambi bolotshi la andi aphonongophela bolimo boninyo la diyota dikinyo wokelaka dina dinandi, la shene ekinyo akambelaka basi yimedya, la shene inyo loyadi wakambelaka o la wina one. 11 Toyadi la mposa enda bonto la bonto ditshidingana inda diyala la bokalanganano one nda baoi anda dilindedya diumela elengi ndi esuka; 12 ina inyo lako diyala la mponye, aye loyalaka shenda baiko baokita bokitshwa bonda alaka la yimedya o la mpitshi. 13 Nda ditshina inda aki Ndjambi alakaka Abalama dilaka dinandi, akiandi ateya ditshimbela bonkina bondolekola bonene, andi aoyatshimbela andi o mele, 14 ayandi, O soosolo, ndokokotshwakola insonyi, onde, insonyi munge; ndokokophudya la bankana eusa; 15 shene akiandi adilaka la botshidingano andi aolamba dilaka. 16 Djoji inda banto bayadi ditshimbaka la bonkina bolecola bonene, la lolaka londa ditshimba loyadi esuka enda dikodi diuma ele iyo; la loko loyadi dikokya baoi. 17 Sheko Nkumundjeyi olangaki ditshumya bokitshwa banda dilako mbo, Botephelo bonami bophonongotshudungana, ko andi aolaphya etshimbelo enandi nd'adiko; 18 Djoji inda baoi baiko baphe baphokusi diphaningwa, la Nkumundjeyi aphokusi disanga bophoto; sheko isho tokeya dikembyama o soosolo, isho ane tombokimana la andi inda yamba dilindedya ikiyo atambedyaka. 19 Dilindedya diko diyadi shenda lungu londa mashua londa betema bendiso; ko loko lombokakatala la lombokemba, ko loko lombotshwa nd'atei anda etoo enda ekukelo. 20 Yeso aototshwela nkoko nd'oso shenda ekima endiso, la andi aoyala Botshedi bona onene botshwako nda iyedi inda Melekinzedeke.

Tshapita 7

1 Ko bont'one Melekinzedeke, nkumu enda Salema, botshedi bona Ndjambi elekola iumela, oyophomanaki la Abalama akiandi wutaka ma diyodjaka bakulaki, la andi ondotshwakolaki insonyi. 2 Ko Abalama ondolambolaki empudi enda bonkama enda djomba diuma; (dikadimola ind'oso dinda dina dinandi mbo, Nkumu enda baoi banda diyonga, o la nkumu enda baoi banda wee; apha la ishe, apha la nyango, apha la lotshwelo, apha la angolelo enda betsho nkina esuka enda lomo; la diwanya dinda bona ona Nkumundjeyi); andi aotshikala botshedi diiyo. 4 Lokanedyaka bonene onda bonto one. Abalama, apha endiso, ondolambolaki empudi enda bonkama enda djomba dikiyo akandaka. 5 Soosolo mele bankana banda Lewi, baolaya bolimo bonda baotshedi, la bale la mpipho enda yamba empudi enda bonkama m'ele anto nda iyedi inda dingembe, ayawe, m'ele bana nyango, nkula iyo baolotshwa m'ele Abalama: 6 aye one apha la lotshwelo m'ele iyo aolamba empudi enda bonkama m'ele Abalama, la andi otshwakolaki bokitshwa bonda balaka

insonyi. 7 Sheko, lako nkula ikokodi, ondolekola itshila aotshwakolama m'ele one ondolekola bonene. 8 Ko ane, baiko bayadi wambaka dimpudi dinda bonkama baokowalomi; aye mpiko endudi One etisholiyo mbo, Andi ayadi la lomo. 9 Sheko, isho tokoka disanga ayisho, Lewi, one oyadi yambaka dimpudi dinda bonkama, aolambodyama dimpudi dinda bonkama aki Abalama alambolaka. 10 Djoyi ina andi ayaki phe nko nda dikundju dinda ishe akiandi aphomanaka la Melekinzedeke.

11 Ko nkina dikokyama dinda baoyi diyaki m'ele baotshedi banda basi Lewi, (nda ditshina inda banto baolaya dingembe m'ele iyo), sheleko ekiyo welenganaka la botshedi bonkina bonda diwanya inda Melekinzedeke, apha ma iyedi inda Alona? 12 La boloko onda akiyo akadimolaka iyedi inda botshedi, diyaki la iyo dikadimola o la dingembe phyophyo. 13 Djoyi inda One ondosangeliyo baoyi ane ayadi ma bonanga bonkina; ko lako nkula bonto ma bonanga bone okambaki bolimo bonda edjakelo. 14 Djoyi dine dileyama phululu mbo, Nkumu endiso aolota na bonanga bonda Yuda; la Mose atosanga djoyi diphoko la boloko bonda baotshedi ma bonanga boiko. 15 Sheko djoyi dine diyolekola yeyama; botshedi botshitshingani bomenama nda diwanya dinda Melekinzedeke; 16 la andi aolilama na mpamba enda lomo lophongeya diphitana, apha shenda dingembe dinda bounu. 17 Nda ditshina inda baosanga djoyi inandi mbo, We oyadi botshedi bonda botshwako Nda diwanya dinda Melekinzedeke.

18 Dika diko baosekola dingembe diki oso la boloko bonda diko diki todula diphala la waphwa; 19 (dumba londa dingembe ditokomanya nkula djoyi diphoko). Sheko dilindedyala dilekola bolotshi dimboyotshwa, dimbeya ditotshutsha ele Nkumundjeyi. 20 Ko djoyi diko imbokokomedyama phe nko la etshimbelo. 21 (Onde, iyo baolakela baotshedi apha la etshimbelo; aye andi aokedyama Botshedi la etshimbelo m'ele One ondosangelaki ayandi; Ayadiako otshimbaki, ko andi aphongokadimola botephelo bonandi: We oyadi Botshedi diyo nda diwanya dina Melekinzedeke.) 22 Sheko Yeso aokitshama botshuku bonda esambi elekola bolotshi. 23 Baotshedi phala baoyelana la boloko bonda bewedi belasuka ditshikalanda bolimo bonda botshedi; 24 aye, la boloko bona andi ayadi ditshikalaka diyo, andi ale la mpipho enda botshedi ephingolami. 25 Dika diko andi la mpamba enda disuka baiko bauma batutama ele Nkumundjeyi nda dina dinandi la yika enda botshwako, la boloko ona andi ayadi ditshikalaka la lomo diyo inda yaotshela. 26 Sheko dikomana la isho diyala la botshedi bona onene bonda shene, botshedi bonda ekila, bopha la batshuya, bopha l'ombe, bomangana la bakedi ban'embe, ombuledyama nd'adiko ana ndjola. 27 Andi aphosambi dilambola belambo la wina la wina shene eki

baotshedi baiko bana enene, nd'oso djoi in'embe bendiyo munge, ko m'okongo o la djoi in'embe benda banto; nda ditshina ina andi okelaki djoi diko bokela bophoko botshwako akiandi ayalambolaka nda bewedi. 28 Ko dingembe diyadi yilaka banto banda todudu nda bolimo bonda baotshedi bana anene, aye lolaka londa etshimbelo, loiko lotephelama m'okongo bonda dingembe, okelaki Bona Botshedi bona onene, ombokomana nko diiyo.

Tshapita 8

1 Etambene, botsha bonda baio ane andotephelisho, boko one mbo, Toyadi la Botshedi bona onene bonda shene, omboyulama nda lo londa bolomi londa bokala onda waphemelo bonda Bolekola onene, nda loola; ale Bonkambi onda ditetenyi inda ekila la bonda dimpema inda soosolo iki Ayadiako ashumyaka, apha banto.

3 Djoi inda botshedi bouma bona onene ombosonama inda dilambola bekakaya o la belambo; sheko diyaki la Botshedi one diyala la emba enda dilambola, o la andi. 4 Ko otoyala andi ayaki na motshi tshika andi atoyala nkula botshedi, la boloko ona ankina balako balambola bekakaya nda iyedi inda dingembe; 5 (baiko bayadi dikambela diwanya la dididingi inda baio banda loola, shene eki Nkumundjeyi asangelaka Mose akiandi wasaka yaanga dimpema, ayandi, Phongaka dikela djomba diumela nda iyedi ikimi akotshumyaka nda bokoto.) 6 Aye, etambene andi aolaya ekambelo elekola ashimba shene ekiandi ayalaka Botephedhi bonda esambi elekola olotshi embokokomela nda balak baolekola olotshi. 7 Aki esambi eiko eki oso atoyala ama olotshi, tshika andi atasa etetenyi enda dikokomedyaka esambi enda iphe. 8 Djoi inda andi aolaphela lolaka, ayandi; Ayadiako aosanga ayandi, Phalaka, betsho bekoya Endokokomedyemi esambi end'oto La diyotshi inda asi Isalele o la asi Yuda; 9 Apha shenda esambi ekimi akokomedyaka la baapa andiyo Nda betsho bekimi wakataka nda lo inda yatondodya Ma motshi inda Edjipitu; Djoi inda iyo batotshidingana nda esambi enami, Emi ntatomanya: sheko embosanga Ayadiako. 10 La boloko onda esambi ekokomedyemi la diyotshi inda asi Isalele M'okongo onda betsho eiko, eko ene: Ndokilalomi dingembe dinami na nkanedya indiyo; Ndokokotiko nda betema bendiyo: Ko emi ndokoyala Nkumu endiyo, La iyo baikoyala banto banami. 11 Iyo bapongekyanya bonto la win'andi, bonto la win'andi mbo, Eyaka Nkumu, we! La boloko ond'iyo ankumela baikondeya nda betema endiyo Ma bonto olekola itshila elengi ndi bonto olekola bonene, nd'atei andiyo; La ndokakesela nda baph'olotshi andiyo, Ko mponguta yophwa bembe bendiyo nkina yesanyi indiyo. Ayadiako atephelela shiko. 13 Akiandi atephelaka inda esambi

end'oto, sheko andi aolekya esambi eki oso nd'okongo. Ko emba enkono elangwa la eyala intshele, eko eongasa ditshwa.

Tshapita 9

1 Esambi eki oso eyaki la toyedi tond'eko soosolo, la etombolelo enda ekila, eko ephongamaki na motshi. 2 Djoji inda impema iphongamaki la etetenyi end'oso, mpiko ekiyo wilaka ilelo enda bonoi la lotonda, la toma tonda ditshumyama; dina inda eko mbo, Etetenyi enda ekila. 3 Nda wudi onda etoo enda aphe etetenyi elako, dina inda eko mbo, Ekila elekola ekila; 4 ekutshu enda bomingi enda ditshumba malashi ekiako, la bokombo bonda esambi bokumbami boko boumela la bomingi; mpoki enda bomingi bokiyo akitshaka mana nkoko eyaki mpiko o la ingondjo inda Arona, iko itshweki tonkankashi, o la diphasu inda bayoko inda esambi. 5 Nd'adiko, bakeluba banda ditombya bakiako, la bako bakumbaki iyeko inda ishei; etambene tophokumi dilosangela baoi ane diphoko, diphoko.

6 Ko, aki baoi aiko aiphongamaka shiko, baotshedi baolotshwa nda iyekele ind'oso inda dimpema diyokamba bolimo ondiyo, 7 ayi, phe nko botshedi bona onene otshwaki nda iyekele inda iphe, wina bophoko na mbula, ayotodya bolungu okiandi alambolaka djoji inda bembe enandi munge o la inda yunga inda banto. 8 Nyuma end'Olotshi aototshumya djoji diko ayandi, Mboka enda yotshwa nda etetenyi enda ekila etophenya nda betsho ekiyo ashumyaka dimpema iki oso; (diko diyadi nimba nda ekeki ene). 9 Nda iyedi indiko iyo bayadi dilambolaka bekakaya la belambo bapheyi dikomanya nkumetema inda baiko bayomemya. 10 Aye iko iyadi nda iyedi inda dilambola nyama la dimedi, la yoka ashi bophu la bophu, la dingembe inda baoi banda djongi, diyolilama elengi ndi akokalomi ekeki enda ephongamelo. 11 Ko aki Kilisito ayakaka, botshedi bona onene bonda baoi band'olotshi baokoyaka, nda iyedi inda dimpema dilekola bolotshi itophongamaki la bakata ana anto, (ayawe, diko ipha ma etongelo one), 12 ko apha la bolungu bona nta nkina bonda iyana ina ngombe, aye andi aolotshwa nda etetenyi enda ekila elekola ekila na mpamba enda bolungu bonandi munge; la andi aolishola eshikolelo enda botshwako. 13 Djoji ina nkina bolungu bonda iyana ina nta la belomi bena ngombe, la etuku enda wadi ona ngombe yeyaka yedya bonto ona mindu ombokosama la eko, ina andi yela nda bounu, 14 sheko bolungu bonda Kilisito ondoyalesaki ele Nkumundjeyi, apha la yulo, la mpamba ena Nyuma enda diiyo, bolecola yedya nkumetema ininyo ma bekeledi benda bewedi, ina inyo dikambela Nkumundjeyi enda lomo; apha o sesoko! 15 Nda boloko one andi ale Botephedhi bonda esambi end'oto. Sheko, djoji inda bewedi esambamaki

inda dishikola baoi ban'embe baokelama nda esambi eki oso, baiko baoletama baokoyala la dilaka inda bokitshwa bonda diiyo. 16 (Nda boloko ona mpene eyadi esambi, diyadi la bonto ondilaki esambi diwa. 17 La boloko onda esambi eyadi la boolo phe nko nkina bokotshi bonda eko aoshila diwa; eko epha la mpamba nkina bokotshi bondeko alako nda lomo.)18 Shene o la esambi esoko eki oso etokidiyama imolaka nda bolungu. 19 Djoi inda aki Mose asangelaka banto ntomo iumela nda iyedi inda dingembe, andi okolaki bolungu bonda tshwana tona ngombe la bona nta la ashi, la bosa ona ngula, la nkashi inda isophe; la andi aoluteya o la bonkanda boko munge o la banto baumela, aosanga ayandi, 20 Bone ole bolungu bonda esambi eki Nkumundjeyi alokekemyaka. 21 Ko andi aoluteya o la dimpema o la balongi banda bolimo baumela la bolungu boiko; 22 sheko, nda iyedi inda dingembe, ntutama la baumba baumela ambedyama la bolungu; ko mpene ephoyadi ekwelo enda bolungu, ayawe ephophyelo ephako. 23 Shene diyaki la iyo yedya diwanya inda djomba inda loola la belambo ene, aye djomba inda loola diko munge imbedyama la belambo belekola ene bolotshi. 24 Djoi inda Kilisito atotshwe nda itetenyi inda ekila ikiyo wangaka la bakata, dididingi inda baoi banda soosolo; aye andi aolotshwa nda loola, loko munge, inda iyenya nd'oso ona Nkumundjeyi la boloko onda isho; 25 lako ina andi diyalesa belesa eusa, shene eyadi botshedi bonda iyedi ind'oso yotshwaka nda ditetenyi inda ekila la mbula la mbula la bolungu bophoyadi bonandi. 26 Atoyala shiko tshika andi ayadi la djoi inda dishinga beshinga phala ma angolelo ena ndjei. Aye andi aolenya wenya bophoko bontulu nda esuka enda ekeki ene, inda iyimola bembe nda diyalambola bolambo, nko andi munge. 27 Shene diyadi la bonto diwa bowa bophoko, ko elombolelo okoyela m'okongo; 28 shene o la Kilisito aolesama bolesa bophoko bonda ditombya bembe ben'anto eusa; la andi aokuta yenya enda iphe ele baiko bayadi wodilaka, apha inda yaalodya baoi ban'embe, aye inda iyo disukama.

Tshapita 10

1 Djoi inda dingembe diki dididingi inda baoi band'olotshi baokoya, ipha ama diwanya ind'ako; la diko dipheyi dikomanya baiko bayadi ditutamaka la belambo belamboliyo la ekeki la ekeki. 2 Nkina apha shiko, ko iyo baolambya yalambola, apha soosolo? Otoyala bamemyi baoledyama wedya bophoko botshwako, tshika iyo batoyaaki la bodito bon'ombe na nkumetema indiyoyi. 3 Aye belambo besoko belophola baoi ban'embe la mbula la mbula. 4 La boloko onda bolulungu bonda balomi bana ngombe la bona nta bophokusi yimola baoi ban'embe. 5 Shene, aki Kilisito ayakaka na motshi andi osangaki ayandi: We otokumbula belambo la bekakaya;

Aye we opmongelaki djongi. 6 We otoshashala nda belambo etshumbamaki, Nkina nda belambo enda dikuka baoi ban'embe. 7 Nda etamba esoko emi osangaki mbo, Phalaka, emi one, ndjoyi Diyokela esangedya endawe, we Nkumundjeyi, Iyo akotaki shene nda wombo onda bonkanda la bolok'onami. 8 Nd'oso, akiandi asangaka mbo, We otokumbula belambo la bekakaya, la belambo etshumbamaki, la belambo benda dikuka baoi ban'embe, la we otoshashala la beko, (beko ekiyo alambolaka nda iyedi inda dingembe) 9 nda etamba esoko akiandi asangaka ayandi, Phalaka emi one ndjoyi diyokela esangedya endawe; andi aolimola djoji diki oso inda dikokomedyo djoji inda iphe. 10 Isho tombokidiyama la esangedya enandi nda boloko onda bolambo bonda djongi inda Yeso Kilisito nga bolambo bophoko botshwako. 11 Ko botshedi boumela boyadi yemalaka la wina la wina nda dikamba bolimo bonandi, la andi ayadi dilambolaka belambo besoko phyophyo bephokusi yimola baoi ban'embe. 12 Aye Kilisito, akiandi alambolaka bolambo bophoko djoji inda yimola baoi ban'embe, amboyulama nda lo londa bolomi lona Ndjambi diiyo. 13 Ma ekeki esoko andi aodila elengi ndi batonyi banandi baokoyala ilamelo enda bekolo benandi. 14 Djoji ina andi aokomanya baiko baokidiyama botshwako la bolambo bonandi boiko bophoko. 15 O la Nyuma end'Olotshi aototshumya djoji ine; la boloko ona m'okongo andi osangaki ayandi, Nkumu aotephela, ayandi, 16 Emi ndokokokomya esambi ene la iyo M'okongo onda betsho beiko; Ndokilalomi dingembe dinami nda betema bendiyo, Ndokokotalom'iko na mpima indiyo. 17 Mponguta yopwa bemb'endiyo Nkula bephedya bendiyo. 18 Ko nkina eshikolelo enda baoi ane elako, topha la djoji inda yasa bolambo bonkina bonda yimola baoi an'embe. 19 Sheko, baina andiso, isho toyadi la ntepho enda yotshwa nda etetenyi elekola ekila na mpamba enda bolungu bonda Yeso, 20 nda yotshwelo end'oto la enda lomo, ekiandi atokidiyelaka, nda wudi onda etoo enda ekumbamelo, ayawe, djongi dinandi; 21 ko tole la Botshedi bona onene la mpipho nda lodu lona Nkumundjeyi; totutami le betema benda soosolo la yimedyo ekembyamaki, la betema bembokosama ma nkumetema in'embe, la baongi bandiso baolokyama la ashi andi phitoo. 23 Totshidingani nda yambodya enda dilindedya indiso apha la ikokodi, (djoji ina One otolakaki balaka ale la botshidingano). 24 La tokanedyani, bonto la onto, tokembyani nkina tokeya yokana lolango la dikela baoi banda olotshi. 25 Totolesaki disangana etenyi ephoko, shene ekela banto amodi, aye tokembyani; tolekoli dikela shiko la boloko ona lombena mbo, Wina boiko ombotutama. 26 Djoji ina nkina toshila yeya botephelo bonda soosolo ko

tokuta ditshdingana la baoi ban'embe, bolambo bonkina bonda yimola bembe besoko bophoyadi ako. 27 Etshiki nko dilindedya dinda bophodu inda elombolelo ekoya la enduku enda boolo enda tsha eyasa ditshumba batonyi. 28 Bonto bouma ondophapholaki dingembe inda Mose awaki, iyo batooka ishei, la elokolelo enda baenyi baphe nkina basato. 29 Sheleko ekanedyinyo nda elu elekola onene ekoka diyaka ele banto baominya Bona ona Nkumundjeyi n'ase anda bekulu enandi, aoleledya bolungu bonda esambi ekiandi akidyamaka mbo, Boko ole mpampa; la aotola Nyuma enda diyota? 30 Isho yeyaka mbo, Nkumu osangaki ayandi, Ditshinanyi iyadi boloko bonami; emi menge ndokotshinanya baoi; la dinkina mbo, Nkumu aokalola baoi anda banto banandi. 31 Dikwa nda bakata bana Ndjambi enda lomo diyadi djoi inda bophodu menge.

32 Aye, lophwaka betsho beki oso beki bonoi atophetelaka la akinyo akembaka nd'atei anda elu ena enene. 33 Nda wudi bomodi inyo looyala ilimbitelo ele banto phala, akiyo alosotshaka, la aknyo wenaka elu; nda wudi onkina inyo looyala bantanyi banda baiko baolena elu nko phyophyo. 34 Inyo lolekesela basi nkandju la inyo loyaki la bosadu nkula banto baolophonola djomba dininyo, la boloko oninyo yeyaka mbo, Tole la djomba dilekola olotshi dikotshikala botshwako. 35 Sheko, lotolesaki dilindedya dininyo djoi inda diko dile la diphutu ina onene. 36 Diyadi la bonto ditshidingana la dikela esangedya ena Nkumundjeyi, ko lokayalomi dilaka dikiandi alolakaka. 37 La boloko onda alekalomi betsho lako phala, One ondoyadi la diyaka, aokoyakalomi soosolo, aphonoguta didila. 38 Aye bosu dilonga aokulama la lomo ma yimedyo enandi ele emi. Ko nkina bonto aokuta dikenda ambutambute, botema bonami bophongoshashala el'andi. 39 Aye isho tophoyadi nda bolongo bonda baiko bakenda ambutambute nda ephitanelo, ko toyadi nda bolomba bonda baiko bale la yimedyo enda yika nda betema bendiyo.

Tshapita 11

1 Shene, yimedyo eyadi bokupha bonda baoi balindedy' isho, la etshumyelo enda baoi batophenya. 2 Na mpamba end'eko dingambe dindiso baolaya esheledyelo enda bolotshi. 3 La yimedyo tokandjwe mbo, Motshi itongamaki la lolaka lona Nkumundjeyi; shene, djomba inen'isho la baisho ditotongama ma baumba balenya nda baisho bandiso. 4 Nda yimedyo, Abele olambolaki Nkumundjeyi bolambo bolecola boko boki Kena alambolaka bolotshi. Ndjambi aolosheledya bolotshi akiandi wambaka bekakaya m'ele andi: nda yimedyo esoko andi ayadi ditephelaka o la wina one, nkula andi awaki. 5 Nda yimedyo Enoka aolimolama ma motshi mbo, Atenaki bewedi. Andi atuta yenama n'ase la boloko ona

Ndjambi aolokola: djoji inda nd'oso ona andi atimolama andi aki la bosako mbo, Andi aoshashadya Ndjambi. 6 Ko bonto bopha la yimedyana apheyi yoshashadya; la ditshina inda diyadi la bonto bondoyaki ele Nkumundjeyi yimedyana ayandi, Ndjambi ayadiako, la andi ayadi bophuti bonda baiko bayadi yoasaka. 7 Nda yimedyana Noa aolepholama m'ele Nkumundjeyi inda baosi batophoyaka; akiandi wokaka bophodu andi aolaanga wato bonda lodu inda disuka diyotshi dinandi. Nda djoji diko andi aolumba basi motshi boloko, ko andi o munge aoyala bokitshwa bonda baosi banda bolotshi nda iyedi inda yimedyana.

8 Nda yimedyana, aki Abalama wetamaka, andi aolambodyana djoji inda dikenda nda etetenyi ekiandi wasaka yamba nga bokitshwa bonandi; ko andi aoludwa ma mpiko ekiandi wulamaka, ateya wudi oleko okiandi akendaka. 8 Nda yimedyana andi aolulama shenda bophaya na motshi inda dilaka shena na motshi ipha inandi; aolulama na mpema etenyi ephoko la Isaka la Yakobo, bakitshwa la andi banda dilaka diko diphoko. 10 Djoji ina andi aolindedyana bola boyadi la ditshina inda boolo; Nkumundjeyi ale Wangi la Boshumyi bonda boko. 11 Nda Yimedyana o la Sara, andi mele aolayana mpamba enda diphoswa djemi akiandi lokusu lolekola; la boloko ona andi aolimedyanayandi, One ondolakaki ale la botshidingano. 12 Sheko ko bonto bophoko, ondoyaki shenda bonto ombowa, m'ele andi baoyala bana nga totshi tonda lola la shena bokenye bole nda bokenge bonda ashi an'anene, bapheyaniyalola.

13 Banto ane bauma bawaki nda yimedyana nd'oso onda iyo batophoyamba alaka, ko akiyo wenaka ako ma itatali, baolambodyako, la baolimedyanambo, Toyadi baphaya la bakwala na motshi. 14 Djoji inda baiko batephela shiko ambishola mbo, Tasa motshi inkina. 15 Onde, atoyala iyo baokanedyanamotshi ikiyo atshikaka, tshika bayaki la djowa inda yuta yita nkoko. 16 Aye, etambene iyo yasaka motshi ilekola ashimba, iko iyadi nda lola: sheko Nkumundjeyi aphoki nsonyi inda iyo yoeta mbo, Ndjambi endiso; djoji ina andi aolashumelabola.

17 Nda yimedyana, aki Abalama amekamaka, andi olambolaki Isaka; one onambaki alaka l'oshadu, aolambola bon'onandi dikinda okiandi wotaka. 18 And'iko oki Nkumu asangaka mbo, Bankan'andawe baoketama m'ele Isaka. 19 Andi aolimedyanambo, Nkumundjeyi la mpamb'enda yoetolanakula m'atei anda bawaki; la andi aolamba m'aiko nga eshile. 20 Nda yimedyana Isaka otshwakolaki Yakobo la Esau inda baosi batophoyaka. 21 Nda yimedyana Yakobo otonyaki bana band'ele banda Yosefu insonyi akiandi asa diwa; andi omemyaki Nkolo, aolekama na ingondjwa inandi. 22 Ko nda yimedyana, aki Yosefu asa diwa, andi otephelaki djoji inda lokenda londa

basi Isalele (ma Edjipitu), la andi onda ke kemyaki la boloko onda yeshi enandi.

23 Nda yimedyana, aki Mose wotshwaka, baotshi banandi baolisha nshongi isato boloko onda iyo baolena mbo, Andi ale la bolangala; iyo batoki engembe enda bokulaki bophodu. 23 Nda yimedyana, aki Mose wulaka, andi otonaki ditangema mbo, Bonda dwele bona ona oki Farayo. 25 Andi osonaki mbo, Nen'elu emi la banto bana Ndjambi, apha dishashala la baoti ban'embe batshikala nko betsho lako phala. 26 Andi aoleledya dikutola dinda Kilisito ayandi, Diko imbolekola bayonga banda Edjipitu bolotshi, boloko ona andi aolindedyana diphtu dikoyaka. 27 Nda yimedyana andi otshikaki Edjipitu, atoka nkele enda bokulaki bophodu; la andi otshidinganaki akiandi wenaka one ophenami. 28 Nda yimedyana andi okelaki bolambo bonda iyeta la ekoselo enda bolungu la boloko onda bondjaki bona ansomi aphoyakata. 31 Nda yimedyana, Raba, bomoto onda iphota, atowaki la bankina batambodye lolaka, la boloko ona andi aolamba balophodi la wee.

32 Ko ndokuta ditephela djoi inkono? Emi mpoyoyala la djowa inda dilosangela bosako bona Ngideona la Balaka la Samisona la Samwele la basangi baiko: 33 nda yimedyana iyo atekyaki yaphemelo, akelaki baoti banda olotshi, baolamba alaka, baodipha berumvu bena nkinimbwe; 34 iyo aphophyaki mpamba enda tsha, baolupha mpya enda lokuto, baoyala la mpamba nda todutondiyo, baoyala la ntepho nda boshela, baokima belomba benda asi benanga. 35 Baimato baolamba bawaki bandiyo nda yetshwelo ma bewedi; bankina baoshingyama, batimedyana etshongolelo eiko inda iyo diyala la yetshwelo elekola bolotshi. 36 Bankina baokinda elu nda ditolama la dikphulama mpimbo; baolembama, baotshungama na nkandju. 37 Banto baolaoka bayoko, baolatenola la nshi; iyo baokutshama, iyo bawaki bewedi la lokuto; iyo atshatshilaki nda ikutu ina enkoko la ikutu ina nta; baolelengana la djomba, baokinda elu, la banto baolakelel'ombe; 38 (basi motshi batokusa yeledyama la iyo bolotshi); iyo baotshatshila nda ditetenyi ina mpampa nda beswi la nda bekoto, o la nda tophukphu la yoko ena motshi.

39 Iy'ane bauma baolayana bosako ma yimedyana, batophamba dilaka: 40 Ndjambi aotophongela djoi dilekola bolotshi inda iyo batokomanaki lako nde nda bolongo bondiso.

Tshapita 12

1 Nda boloko onda isho todingama la bolomba bona onene onda shiko bonda baenyi, timoli bedito beumela, o la bombe boiko bophoteme ditodingitanyana, tokimani la botshidingano bophunguswana bonda iyango

boyadi nd'oso ondiso; 2 tokurumwi phe nko Yeso, Wangi o la Bokokyi onda yimedya; djoï inda bosadu boki nd'oso onandi, andi okusaki elu enda kuruse, aoleledya nsonyi enda eko mpampa, aokenda diyulama nda lo londa bolomi lona imbata inda dimemya ina Ndjambi. 3 Lophongaka dikanedya one olena elu ena onene m'ele banto ban'embe, nko andi menge, inyo lotopholemvwa, lotophoteka na mpima ininyo.

4 Djoï ina inyo lotophuteya bolungu boninyo nda boshela bonda baoi ban'embe bonun'innyo. 5 Inyo lomboshila yophela dilaka diko diyadi dilotephelaka nga ele bana band'ele mbo, Bona bonami bonda dwele, tosotshaki ekphulelo ena Nkolo; totekaki akokutolandi; la boloko ona Nkolo ayadi dikphulaka baiko bandokandi lolango, la andi yetshaka bona bonda dwele bouma onambandi mpimbo. 7 Inyo loyadi yenaka elu djoï inda yekela; Nkumundjeyi ayadi dilokelelaka shiko shenda bana banandi band'ele. Bona onkono ophokphulami m'ele ishe? Ko nkina inyo lophokphulami shene ekelama ele bana bauma, ko loyadi bana banda bokelo, lophoyadi bana band'ele banda yotshwa. 9 O la isho toyaki la baapa bandiso banda baongi, la iyo atokphulaki, la isho andamemyaki; apholekola bolotshi isho dikitela Apha enda bedimo la yika? 10 Onde, iyo baotekedya betsho bemodi shene ekiyo wenaka olotshi; aye andi aotekedya nda ditshina inda waphwa ondiso, la inda isho yaya baoi banda ekila m'ele andi menge. 11 Yekedyama ephokumi diyala la bosadu nda etamba enda elu, aye m'okongo, eko ekotshwalomi mammo inda baoi bana onanwa la banda wee ele baiko baikophokwa mpima enda eko. 12 Sheko luledyaka belo baolendela o la baongo baolemvwa; 13 lophongelaka ekulu eninyo mboka ina nwaa, oshi lwata atophozetela ma lokalo, aye ina andi disukama. 14 Loyelaka baoi anda pholee la banto bauma, o la baoi banda ekila; bonto ophoyadi la eko aphongenana la Ndjambi. 15 Lophalaka olotshi, bonto aphelengani la diyota dina Nkumundjeyi; bokindja bonda bolulu bophosekwi bonda dilophukya la diphita banto phala: 16 bosì mposa, nkina bosì dilula aphotanemi nd'atei aninyo, shenda Esau, boiko osombyaki bokitshwa bonandi inda yaya bomaka bonda toma tonda dila. 17 Inyo yeyaka mbo, M'okongo, akiandi alangaka yaya bokitshwa, andi otonamaki (la boloko bona andi atotana etetenyi enda dikalanganya botema), nkula andi aolasa eko la baisodi nda baisho.

18 Djoï ina inyo lototutama nda bokoto bokoka dikatama la bakata, boiko bophetaki la tsha, boki la widima la tshuu la ephelele, 19 la lophoso londa iphungi la baoi bana mpamba; aki iyo wokaka baoi baiko baoloonda Nkumundjeyi ayiyo, Tutaki ditosangela djoï dinkina; 20 (nda ditshina inda iyo batokusa dingembe dik'iyo wambaka: la nkina nyama emodi ekikamela

bokoto, inyo lokok'eko bayoko; 21 la aki Mose wenaka eneyelo eiko enda bophodu mele andi osangaki ayandi, Nsholekola diwa la bophodu la nsholenga munge.) 22 Aye inyo lombokundjwa nda bokoto bonda Siona, o la bola bona Ndjambi enda lomo, Jerusalema enda loola; o la ele belomba bena enene benda bandjelo, esukamelo ena ndjei eumela; o la Ekelezia enda basomi bayadi la baina bandiyo akotami nda loola; o la Nkumundjeyi, Bolombodi bonda banto bauma, o la bedimo ben'anto band'olotshi embokomana bya; 24 o la Yeso, Botepledi bonda esambi end'oto; o la bolungu bokusami, boiko botephela baoi band'olotshi balekola boko bonda Abele. 25 Lophongaka lako ditona one otephela baoi baiko. Djoji ina nkina iyo batosukama akiyo atonaka one ondotephelaki ele iyo na motshi, ko elekola ele isho nkina tokokingwa m'ele one atephela ele isho ma loola. 26 Nda betsho beiko lolaka lonandi lophukyaki motshi; aye etambene andi aotangya ayandi, Ekeki ene ephoko emi ndokuta diphukya apha motshi intulu;ndokophukya o la loola. 27 Sheko, djoji dine, Ekeki ene ephoko, diko ditotshumya mbo, Djomba dikophukyama dikimalomi shenda djomba itongamaki, inda djomba dipheyi diphukyama ditshikali diiyo. 28 Shene, akiso wambaka waphemelo bopheyi diphukyama, toyali la diyota inda dishashadya Nkumundjeyi nda yokambela bolimo bonda yomemya la bophodu, djoji ina Ndjambi endiso ale tsha tophulamela.

Tshapita 13

1 Lotshidinganaka yokana lolango shenda bana ana nyango. 2 Lotophelaki dikelela baphaya bolotshi; djoji inda bamodi baolamba bandjelo baphiyo weyi. 3 Lophwaka baiko bale na nkandju shene o la inyo lombolembama la iyo; o la baiko baokinda elu shene o la inyo nda baongi phyophyo. 4 Diyala dimemyami ele inyo baumela, la baoi banda bokelo batokelami; ko Nkumundjeyi aokokwela basi bokelo o la baiko bakitsha mposa boloko. 5 Lotoyalaki la bonkita nda lomo loninyo; losalanganaka la baoi baninyo banda etambene; la boloko ona andi munge osangaki ayandi, Emi mpongolotshika la mpongoludwa. 6 Sheko, kela tokembi nda betema bendiso la tohangi mbo, Nkumu ayadi bontanyi bonami, mpongoka bophodu; bonto onkono aokonkelel'ombe? 7 Lopwaka balokodi baninyo, baiko baoloshishela djoji ina Ndjambi; lokanedyaka bekeledi bendiyo, lokolaka yimedyandiyo. 8 Yeso Kilisito ayadi o phyophyo win'oki lomi, o la win'one, o la elengi ndi diiyo. 9 Lotophukyamaki la yekyelo enda batshuya anda banto yophu la yophu; diyadi olotshi botema dikemba la diyota, apha la toma tonda dila. Baiko baoyela baoi baiko batoyala la waphwa. 10 Isho toyadi la edjakelo ephokoki baiko bakambela lodu lona impema dila nkoko. 11 Djoji

inda bekupha bena nyama isoko iyadi botshedi bona onene ditodyaka bolungu bond'iko nd'atei anda djowa inda ekila elekola ekila, beyadi ditshumbamaka n'andja anda ikandu. 12 Sheko, o la Yeso aolena elu n'andja anda wisho bonda ikandu inda yedya banto la bolungu bonandi menge. 13 Nda ditshina ine tokende el'andi n'andja enda ikandu; timedye dikutolama isho la andi, 14 djoi inda tophokatshi bola bonda otshwako ondoko, aye tombasa bola bokoyaka. 15 Sheko, tolamboli bolambo bonda dimemya diphoshili ele Nkumundjeyi, o shena mammo ma mbewu indiso nda yishola dina dinandi. 16 Lotophelaki dikelelana bolotshi la ditanana: djoi ina Nkumundjeyi aoshashala soosolo la belambo benda bophu one.

17 Lambodyaka baoi banda balokodi baninyo, lokitelak'iyoy; djoi inda iyo bayadi ditomanyaka betema beninyo oshenda banto baokedyamelomi, inda iyo yeledyama la bosadu, apha la bodyalengo, la boloko ond'oko ophongokoka diyala waphwa ele inyo.

18 Lotootshele Nkumu; djoi inda isho tombimedya mbo, Tole la Nkumotema enda olotshi, la tolanga dikenda nko nwaa la baoi bauma. 19 Ndolekola diloonda mbo, Lokelaka nko shene ina emi yeya yuta diyaka ele inyo lako elengi.

20 Ndjambi enda baoi anda wee, boiko bonduteyaki botomanyi bona onene bona en koko m'atei anda bawaki na mpamba enda bolungu bonda esambi enda botshwako, Nkumu endiso Yeso, 21 alokomanya nda baoi band'olotshi bauma ina inyo dikela esangedya enandi, la inda dikela baoi banda yoshashadya nd'atei aninyo nda dina dinda Yeso Kilisito. Dimemya inda diiyo diyali ele andi. Apha o sesoko?

22 Ko ndoloonda, bana ana ngoya, dimedyaka djoi inda dilokokomya; la boloko ona emi nsholokotela phe nko baoi lako phala.

23 Leyaka mbo, Wina bondiso Timote aolembolama ma lonkandju; nkina andi aokoyaka lako elengi, ko emi la andi tokenana d'inyo. 24 Lodingaka balokodi baninyo la bakilami bauma. Basi Italia balodinga. 25 Diyota inda iphepha diyali la inyo baumela. Apha o sesoko!